

TIIT

Tiit hã Paw-Ro ma erih do hahỹyh

1 Ỹ Paw-Ro, P'op Hagã Do karom seeh, Jesus Kristo mejũũ do see ỹ ti hỹyh. Ỹ Jesus mejũũ ỹ masa P'op Hagã Do asẽew bong doo, baad ta hã rah'yy ka'eeh hyb n'aa, baad hadoo do ky n'aa P'op Hagã Do karẽn doo da ji bawãt hanoo doo, rabahapãh hyb n'aa. ²Ta hã rah'yy ka'eeh do hyb n'aa, baad hadoo do ky n'aa rabahapãh do hyb n'aa, P'op Hagã Do wẽ sa h'yyb tym nadajẽp do ragada. Sahõnh hẽ tadu dahãng do pooj jé P'op Hagã Doo, wanadii doo, taky n'aa eno dãk paa ji h'yyb tym hawãd had'yyt do ta wẽ. ³Hỹ kã, tah'yyb dãng do noo gó, ỹ ber'oot do hã P'op Hagã Do metẽeh nanãng taky dãng do paah. P'op Hagã Doo, ẽr h'yyb tym dẽeb h'yyb dãng hã ỹỹ, ỹ tamejũũ, ta ky dãng do ỹ baher'oot hyb n'aa, ỹ wén metẽek ta wób sa hã.

⁴ Ỹ ky n'aa edẽng õm Tiit, nemon ỹỹ Jesus hã mah'yy ka'eeh do hyb n'aa tah ỹ hado dãk doo. Ỹ karẽn P'op Hagã Do ẽr Yb, Kristo Jesus ẽr h'yyb tym dẽeb na-ããj hẽ ky en'yym a hã. Ỹ karẽn baad õm rah'yyb n'yym.

Jesus hã h'yy ka'eeh do sa wahẽ n'aa ji asẽew hõm do ky n'aa hahỹyh

⁵Õm ỹ eréd gẽet tsyt dẽeg hã Keret hãd nãng doo bã, baad nadoo do Jesus hã h'yy ka'eeh do mahang hanãng do mabenãm hyb n'aa, tsyt dẽeg bã hanãng do panang bã Jesus hã h'yy ka'eeh do sa wahẽ n'aa mabasẽew hõm hyb n'aa õm ỹ mejũũ do paa hadoo da. ⁶Jããm hẽ masẽew baad tawãd bã. Taw'ããts hẽ dooh rahapãh pé ta hã baad nadoo doo. Taw'ããts hẽ sét ub ta ỹým Jesus hã h'yy ka'eeh do wahẽ n'aa hã. Taw'ããts hẽ dooh ta ỹým tawad'ii bã ỹyñh see sii. Ta taah kã, taw'ããts hẽ Jesus hã rah'yy ka'eeh. Taw'ããts hẽ dooh ta taah raky n'aa etsã bã nu meby n'aa nãng do hã. Taw'ããts hẽ Jesus hã h'yy ka'eeh do wahẽ n'aa taah ky dah'eeh do sa yb hã. ⁷P'op Hagã Do wẽ Jesus hã h'yy ka'eeh do sa hagã n'aa moo wãt do hyb n'aa, taw'ããts hẽ baad ub had'yyt hẽ tabawãt, dooh rahapãh pé ta hã baad nadoo doo. Taw'ããts hẽ dooh h'yy kasab'ee do tado bã tii. Taw'ããts hẽ dooh kawaj'ããn yb tado bã. Taw'ããts hẽ dooh jarakẽ hedoo do heẽk do tado bã. Taw'ããts hẽ dooh kahep'uuk do tado bã. Taw'ããts hẽ dooh dajẽer jawén hawãt do

tado bä. ⁸Taw'ääts hē baad tagadoo ta wób ta tób bä. Taw'ääts hē baad hadoo do kamahän do tii. Taw'ääts hē kaja hē denaa hē ta h'yyb tamahüüm tabawät do hä. Taw'ääts hē baad hawät do ti ta wób sa wë. Taw'ääts hē tsyt hē P'op Hagä Do wë tabawäd had'yyt hē. Taw'ääts hē tah'yy keb'aah nesaa do hä. ⁹Taw'ääts hē Jesus ky n'aa ër ma metëek do baad taky daheeh, tabahajaa hyb n'aa baad hadoo do ky n'aa tama metëek ta wób sa hä, tabahajaa hyb n'aa tah'yyb en'yyim sa hä, raky daheeh hyb n'aa ky n'aa heh'äät ub do ky n'aa, tabahajaa hyb n'aa ky n'aa heh'äät do majiĩ hä tametëeh res'õos doo.

¹⁰Tii da ÿ wén erih, hajök rah'yy kawereem däk do hyb n'aa heh'äät ub do ky n'aa hä. Daap hadoo do rama met'ëeg kän, ta wób rawedii. Ta ti hedoo do sa mahang hajök ji hä ramejüü Judah buuj ky n'aa jaw'yyk do mejüü doo da ji bawät. ¹¹Taw'ääts hē ji ky meduuk ta ti hedoo doo. Ji wén meduuk, Jesus hä h'yy ka'eeh do wób, sa panaa hē, raky dahé kän do hyb n'aa nanäng ma matëg oow panyyg, baad rawén ky nadahé wät baad hadoo do ky n'aa hä. Dajëer ragahëen do hyb n'aa né hē ta ti rama metëek, nu meby n'aa nyy né paawä dajëer ji gahëen bä ta hyb n'aa. ¹²Hah'ÿ da tsyt dëeg hä Keret häd näng do buuj seeh, noo ese do her'oot paa Keret buuj sa ky n'aa: “Noo kanesa had'yyt hē Keret buuj”, näng mäh. “Tabanes'aa hedoo. Moo nehõj, tsyym nehõj, h'yyb nehõj. Ta bahänh haw'aa doo”, näng mä ta kyyh. ¹³Te hub né hē Keret buuj sa ky n'aa ta her'oot do paah. Ti hyb n'aa manabuuj gedo Keret buuj Jesus hä h'yy ka'eeh do daap hadoo do ky dah'eeh doo, baad raky daheeh hyb n'aa baad hadoo do ky n'aa, ¹⁴raberéd hõm hyb n'aa Judah buuj panyyg ub hadoo doo, noo kanesa doo. Mamejõ reréd hõm hyb n'aa ajyy baad hadoo do ky n'aa ty n'aa ges'yyk do sa hä mejüü doo. ¹⁵Baad tado bä ji h'yyb tym P'op Hagä Do matym gó, baad däg sahõnh hē ji hä. H'yyb tym nasaa do hanäng do hä, Kristo Jesus hä h'yy kana'eeh do hä, sahõnh hē nesaa däg ta hä. Baad nado wäd ti sa h'yyb. Nesaa do rahyb n'aa newë had'yyt hē. Dooh rah'yy kamedug wäd bä nesaa do hä, baad nado wäd do hyb n'aa sa h'yyb tym. ¹⁶P'op Hagä Do rahapëë né paawä m', sa nooh, ramoo bok do hä daap ramenyyh ji bahapäh. Tak'ëp nesaa do ta ti P'op Hagä Do matym gó. Ti hyb n'aa P'op Hagä Do ganen'aak. Dooh raky dahé bä P'op Hagä Do kyyh. Tabad'op hē baad hadoo do rahajaa pé ramoo boo bä.

**Baad hadoo do ky n'aa ji tama metëek doo
da ji bawät do ky n'aa hahÿÿh**

2 Õm kä, taw'ääts hē baad hadoo do ky n'aa hana do mama met'ëeg Jesus hā h'y'y ka'eeh do sa hā. ² Ajyy wehēh hedo padëek do sa hā mama met'ëeg, kaja hē denaa hē sa h'y'yb ramahũum hyb n'aa. Mama met'ëeg sa hā, baad rababok hyb n'aa, sa hā ta wób raweh'ëeh hyb n'aa. Mama met'ëeg sa hā, rah'y'y keb'aah hyb n'aa nesaa do hā. Mamaher'ood sa hā, baad ub P'op Hagä Do hā rah'y'y ka'eeh hyb n'aa, ky n'aa hanäm do baad ub raky daheeh hyb n'aa. Mamaher'ood sa hā, ta wób rakamahän hyb n'aa baad ub. Mamaher'ood sa hā, rah'y'y ganejē hōm hyb n'aa P'op Hagä Do karēn doo da ji bawät do hā. ³ Ti hadoo ÿÿj wehēh hedo padëek do sa hā kä. Mamaher'ood, P'op Hagä Do karēn up doo da rababok hyb n'aa, P'op Hagä Do hā had'y'yt hē rah'y'yb padëek hyb n'aa na-ääj né hē. Mamaher'ood sa hā, ta wób ranu maner'oot hyb n'aa. Mamaher'ood sa hā, jarakē hedoo do noo ranahadoo hyb n'aa. Taw'ääts hē baad hadoo do ti rametëek. ⁴ Tii bā kä rahajaa rama met'ëeg bā kä ÿÿj wanehēh nā doo kä, sa patug, sa taah rakamahän hyb n'aa, ⁵ sa h'y'yb ramesoo hyb n'aa baad nadoo do ji h'y'yb karēn do jawén ranabok hyb n'aa, baad rakan'y'yh baad hadoo do hā rababok hyb n'aa, baad ramoo bok hyb n'aa sa tób bā, raky en'y'ym hyb n'aa, sa patug raky daheeh hyb n'aa na-ääj né hē. Taw'ääts hē tii da ÿÿj wanehēh nā do rabad'oo, sa hyb n'aa P'op Hagä Do ky n'aa ta wób raky n'aa narejää hyb n'aa. ⁶ Hÿÿ kä, ajyy wanehēh nā do hā kä. Tak'ep péj mamaher'ood sa hā, sa h'y'yb ramesoo hyb n'aa ji h'y'yb karēn do jawén ranabok hyb n'aa. ⁷ Õm kä tii, taw'ääts hē baad hadoo do mamoo wäd had'y'yt hē, a hā ta wób rahegää bā, mabawät doo da rakarēn rababok hyb n'aa. Mama met'ëeg P'op Hagä Do ky n'aa t'öp madäk doo me, j'ooj madäk doo me nado. Maky n'aa manesuj manä P'op Hagä Do ky n'aa mamet'ëeg bā. ⁸ Baad mama met'ëeg baad hadoo do ky n'aa, raky nasēm hyb n'aa òm, a majiĩ hedoo do ranu mebyng hyb n'aa ranaw'y'yt do hyb n'aa baad nadoo do er ky n'aa. ⁹ Mamaher'ood sa karom kanep'aak do sa hā, sa kariw n'aa raky dahé had'y'yt hē hyb n'aa sahōnh hā. Mamaher'ood sa hā, sa kariw n'aa rah'y'yb en'y'ym hyb n'aa. Mamaher'ood sa hā, raky ganadoo hyb n'aa sa kariw n'aa. ¹⁰ Mamaher'ood sa hā ranets'ëek hyb n'aa sa kariw n'aa ma. Taw'ääts hē baad ub rababoo had'y'yt hē, sa kariw n'aa rah'y'y ganenäh hyb n'aa sa hā. Tii bā, sahōnh hē baad ramoo bok do hyb n'aa,

baad ub ta wób rabaher'oot da P'op Hagä Doo, er h'yyb tym dëeb ky n'aa hä.

¹¹Ta ti ÿ wén erih, tak'ëp P'op Hagä Do ky enyym ji hä tametëeh, nes'aa né hë paawä ji. Ti hyb n'aa, sahõnh hë badäk hahÿÿ bä habong do ta hä h'yy ka'eeh do tabed'ëep nesaa do mahãnh, hÿ pong jé ta pa rababok hyb n'aa. ¹²Ji hä tak'ëp P'op Hagä Do ky enyym do hä, ji tametëek ji moo nawäd wät hyb n'aa P'op Hagä Do ganen'aak doo. Ji tametëek badäk hahÿÿ hä habong do P'op Hagä Do hä h'yy kana'eeh do h'yyb karën do ji beréd hõm hyb n'aa. Ji tametëek ji h'yyb ji mesoo ji h'yyb karën do jawén ji nawät hyb n'aa, baad hadoo do ji moo wät hyb n'aa, P'op Hagä Do karën do hä ji h'yyb däk hyb n'aa na-ããj né hë badäk hahÿÿ hä ji bawät nä bä. ¹³Tii da er babok, baad er gada do hyb n'aa Jesus Kristo ta bag tak'ëp gabarëeh do mahang p'aa hënh takasee doo. P'op Hagä Do Sahõnh Hë Haj'ap Doo, ji h'yyb tym dëeb né tii. ¹⁴Ta daaj hë takan'oo däk dajëb hä er hyb n'aa, sahõnh hë nesaa do mahãnh er tabed'ëep hyb n'aa, nesaa do er h'yyb tym gó hanäng do tabawug hõm hyb n'aa, ta karapee baad hadoo do moo bok do karën do er bahado däk hyb n'aa.

¹⁵Taw'ãäts hë ky n'aa jawyk doo me mama met'ëeg ta ti õm ÿ ma erih doo. Tak'ëp péj mamaher'ood sa hä raky daheeh hyb n'aa mama metëek doo. Manabuuj gedo nabuj keh'üüm doo. Man'oo õm raty n'aa gesyng manäh!

Baad hadoo do ji moo wät do ky n'aa hahÿÿh

3 Maher'ood Jesus hä h'yy ka'eeh do sa hä, raweh'ëeh hyb n'aa sa häj n'aa wahë n'aa, ta wób hagä n'aa hedoo do na-ããj né hë. Maher'ood sa hä, raky daheeh hyb n'aa ramejüü doo. Mamaher'ood sa hä, moo hahüünh doo gó ramoo boo had'yyt hë hyb n'aa baad hadoo doo. ²Maher'ood sa hä, sa da hadoo do raky n'aa narejää hyb n'aa. Maher'ood sa hä, rakawanejån hyb n'aa ta wób sa wë. Taw'ãäts hë raky en'yym ta wób sa wë. Taw'ãäts hë baad raky n'aa en'yym ta wób sahõnh hë rah'yy kanasab'ee doo gó.

³P'ooj ub, Jesus er nahapäh nä noo gó, er na-ããj hë dooh paa er h'yy genä bä. Dooh paa er ky daheeh péh. Èr paa ta wób rawedii. Dooh paa er haja bä er eréd bä nesaa do ji h'yy karën doo, taw'ãäts hë er ed'oo do paa er hä. Nesaa do had'yyt paa er ehat. Ta wób paa er hyb n'aa jewës. Èr hyb n'aa ge'ëenh paa ta wób. Tii d' paa rabad'oo ënh er hä. ⁴Tii bä kä, ji takamahãn doo,

ji wë taky enyym do na-ãāj hē P'op Hagä Do ər h'yyb tym dëeb metëeh bä kä, ⁵ər tabedëeb wät nesaa do mahãnh. Baad hadoo do ər moo bok do jawén nado ər tabedëeb wät. Ɛr tat'yyd mehĩn do hyb n'aa ər tabedëeb wät. Hahỹỹ da ər tabedëeb wät: Nesaa do ər h'yyb tym gó hanäng do tabawug hõm. P'aa hënh ər henäng do hadoo tan'oo bä ər h'yyb tym. PapuuƵ hado däk ər babok tan'oo bä. Ta Sahee hejój me tii d' tabad'oo ər hã. ⁶Ky n'aa etsëeh P'op Hagä Doo. Baad tabanoo ta Sahee ər h'yyb tym gó, Jesus Kristo ər h'yyb tym dëeb hyb n'aa. ⁷Baad ər bahado däk ta matym gó P'op Hagä Do an'oo bä, taky enyym do hyb n'aa ər wë, nes'aa né paawä ƛer. Ta Sahee tabanoo ər hã, ta taah ər bahadoo hyb n'aa kä. Edëb had'yyt do ər gadoo da hỹỹ kä, baad ər bahapäh. ⁸Te hub né hē ta ti ỹ her'oot doo. Ti hyb n'aa, ỹ karën baad had'yyt hē mamet'ëeg ta ti ỹ her'oot doo, baad hadoo do P'op Hagä Do hã h'yy ka'eeh do ramoo boo had'yyt hyb n'aa. Baad né hē ta ti kametëek do ky n'aa sahõnh hē badäk hahỹỹ hã habong do sa hã.

Ta s'ee hënh ma met'ëek do sa ky n'aa hahỹỹh

⁹Õm kä tii, maaaa newë manä daap kahe'oot do Judah buuj wahë makū sa häd ketsén do hã. Awäd manä Mosees ky n'aa jaw'yk do p'ãã ky ked'aak do sa mahang, kawaj'ããn gó ky ked'aak do sa mahang. Daap ti ta tii. Ji hã masa do nado tii. Ti hyb n'aa, maaaa newë manäh, awäd manä sa mahang, ỹ wén näng. ¹⁰Taw'ããts hē pawóp nuu me da maky meduuk jé daap rama metëek doo me séd h'yyb nehedo boo ran'oo bä Jesus hã h'yy ka'eeh doo. Õm raky nadahé nä bä, dawëë kanä da sa mahãnh.^a ¹¹Ta ti hedoo do rah'yy kawereem kãn baad hadoo do ky n'aa hã. Mahapäh né hē tii. Nesaa do had'yyt hē sa hã. Sa daaj hē raky n'aa ketyy nesaa do hã. DooƵ baad rado bä P'op Hagä Do matym gó.

Tiit hã Paw-Ro kedëe hõm do ky n'aa hahỹỹh

¹²Ỹ mejũũ da Aretemas häd näng do a wë. Aretemas ỹ manejó bä, ỹ mejũũ da Tikiko. A wë takajaa bä, ỹ karën, tahaja bä, nayyw hē mabana wë ỹỹ, Nikoporis häd näng doo bä. T'ĩĩ hënh ỹ h'yyb däng ỹ bahõm, tabahahëem do noo gó ỹ tabës hyb n'aa tii bä. ¹³Senas häd näng do hã kä, ky n'aa jaw'yk do baad hapäh doo, Aporos daheeh ratsyym kasog bä tii b' naa, ỹ karën baad mamasaa

^a **3.10** Ta ti hedoo doo, dooh ji an'oo bä ta wób rama met'ëeg bä. Dawëë ji kan'yh sa mahãnh.

sa hã mahajaa doo me. Man'oo sa hã rabatsëk do waa n'aa hedoo doo. ¹⁴Õm had'yyt hẽ nado masa. Taw'ããts hẽ ër wakããn, Jesus hã h'yy ka'eeh do na-ããj hẽ rama kametëëk baad hadoo do ramoo bok ramasa hyb n'aa bedoh do sa wë. Taw'ããts hẽ tii d' ji bad'oo daap ji aboo mahãnh.

¹⁵Sahõnh hẽ pa ÿ habok do õm mä rahyb n'aa esee. Mamaher'ood sahõnh hẽ kamahãn do ãã hã, ër wakããn Jesus hã h'yy ka'eeh doo, ÿ hyb n'aa esee sa hã. ÿ karën P'op Hagã Do ky enyym sahõnh hẽ bë hã. Jããm hẽ kã.